

Cousta canson a l'è giuamai furnia,

Ma antant mi sento ampò ch'a m'ven la pvia.

Portè ampò dunna dunna d'coula bagna,

I m'sento ch'la saliva ormai s'stagna.

Mi veui peteve un poch a tuti un brindes,

E s'an bastrà pa d'un, v'na petreu quindes.

Ades netieve pur tuti la boca,

E peui andé a durmi che l'aso v'toca.

**Dialogo tra un Marito stitico e sua
Moglie lubrica di corpo.**

CANZONE XII.

Agiut, cara mojè,

Ch' i peus pi nen caghè

Pr sfors ch' i fassa;

Astà sul cagador

I dagh ant un sudor,

I dagh ant un sudor

Freid com' la giassa.

E mi, me car mari,

I peus pa pi tni,

Che tut a m' scapa;

E tanta sfoirassà

A m' rend tut' arlassà,

A m' rend tut' arlassà,

E bela e fiapa.

J' eu bel mangè d' bur,

Ch' tant i cago dur

Com' una pera;

J' eu bel piè d' servissiai,

Ch' tant i son a guai,

Ch' tant i son a guai

D' ugal manera.

Mi tenno pur mangià
 D'euiv dur an quantità
 Con d'geladinna,
 E peus nen tni sarà
 L'ussat destenebrà,
 L'ussat destenebrà
 Ch'j'eu al fond d'la schinna.

A m'ven dle spermision,
 Ch'a par ch'a m'seurta un mon
 Dant le buele,
 L'è peui 'l buel culè,
 Ch'ant 'l surti a m'fa 'ndè,
 Ch'ant 'l surti a m'fa 'ndè
 An ciampanele.

E mi che sugession!
 S'me cul a fa 'l mincion,
 E ch'a s' dispensa
 A tirè un pat e mes?
 Le frange venno apres,
 Le frange venno apres
 Senza licensa.

S' i fas quaich brlonat
 Mach gros com' d'fasolat,
 Oh che gran festa!
 E pur j'è n'autr ambreui,
 Prchè a m'fa surti j'euì,
 Prchè a m'fa surti j'euì
 Fora d'la testa.

Ma mi l'è peui bin pes,
 Nessun a m'ven d'apres
 A fè una gnogna!
 Prchè d'coul odorat,
 Ch'j'eu d'ambra con d'zibat,
 Ch'j'eu d'ambra con d'zibat
 E carafogna.

Quand i son li ch' i sprem,
 Venta senti che gem
 I fas anlora!

Ma con me front an man
 I campo ij sfors an van,
 I campo ij sfors an van,
 E ala malora.

Di un poch s'a l'è pa brut,
 Se 'l cul a m'roba tut,
 E com' mai fela?
 Tut giù fin sui garat
 L'è sempre tut maunat,
 L'è sempre tut maunat
 Dla cagarela.

Fra tanti lavativ,
 Sirop e lenitiv
 A gran scudele,
 Un autr avria cagà
 E 'l cheur e la corà,
 E 'l cheur e la corà
 Con le buele.

A dila peui da bon,
 Che gran disperassion
 A l'è la mia!
 Ch' i deba esse obligà
 Mach a tnime netià,
 Mach a tnime netià
 La ciaparia.

J'eu tanti durignon,
 Ch'a smio toch d' piston
 Ant la bedrassa;
 E j'eu bel fè e bel di
 Ch'a veulo nen surti,
 Ch'a veulo nen surti
 Dant la tripassa.

E mi j'eu tavota 'l mnu
 Tut fiap e molanciù
 Com' la basanna,
 Prchè tut a l'opost
 Me cul a l'è pi tost,
 Me cul a l'è pi tost
 Una fontanna.

J'eu mandà piè d' savon,
 E d'euli del pi bon
 A bela posta,
 I veui ancor provè
 D' feme piantè darè,
 D' feme piantè darè
 Una suposta.

E mi j'eu giamai fait tant,
 Ch' i seu pa pi a che cant
 Mai arvireme;
 E tut a m' ha vajù
 Pr tnime 'l corp smovù,
 Pr tnime 'l corp smovù
 E amberlifeme.

Di un poch, mia cara gent,
 S' a l'è un divertiment
 Da cherpè d' rie?
 Dont l' eve mai senti,
 S' i veule pura di,
 S' i veule pura di
 Ste drolarie?

S' a veulo me parer.
 N' armedi bin linger
 M' ij mostro ancora:
 A chila un bon stopon,
 A chiel an leu d' savon,
 A chiel an leu d' savon
 Un gavabora.